

無極縣續志卷之七

人物志上

稱人物者每以山川靈秀所鍾侈陳其事而荒陬僻壤卽間生非常無所藉以表揚之因而湮沒者不少邑惟宋元以上人物可觀降及後世殆所謂表揚無人者歟然賢才不擇地而生教化有方斯英傑輩出矣美稼不發境塉修松不挺培塿夫固未爲篤論也今不讓古深有望於邑人士焉續人物

晉

劉琨魏昌人字越石中山靖王之後也祖邁有經國之

才位散騎常侍父蕃清高沖儉位至光祿大夫從琨
於晉陽城陷爲劉粲所害現年二十六爲司隸從事
惠帝幸長安時豫州刺史劉喬攻范陽王虓虓敗琨
與之俱奔河北琨父母俱爲劉喬所執琨乃說冀州
刺史溫羨讓州於虓及虓領冀州遣琨乞師於王浚
得突騎八百人與虓濟河共破東平王楸於廩邱南
走劉喬始得其父母又斬石起降呂郎因統諸軍奉
迎大駕於長安以勲封廣武侯永嘉元年爲并州刺
史時東嬴公騰自晉陽鎮鄴并土饑荒百姓隨嬴南
下餘戶不滿二萬盜賊縱橫道路斷塞琨募得千人

轉鬪至晉陽府寺焚燬僵屍滿地其有存者饑羸無人色琨翦除荆棘收葬枯骸造府朝建市獄寇盜之來掩襲恆以城門爲戰場百姓負楯以耕屬韃而耨琨撫循勞來甚得物情時劉淵在離石相去三百里許琨密遣離間其部雜虜降者萬餘落在官未期流人稍復雞犬之聲復相接矣雁門烏丸復反琨率精兵禦之劉聰遣子粲及令狐泥乘虛襲晉陽太守高喬以郡降聰琨父母並遇害琨引猗廬並力攻粲大敗之死者十之六琨乘勝追之不能克猗廬以聰未可滅遺琨牛羊車馬而去琨志在復讐而屈於力弱

泣血骨立撫慰夷傷移居陽邑城以招集亡散愍帝
立拜司空都督并冀幽三州諸軍事琨上表讓司空
受都督尅期與猗廬討劉聰尋猗廬父子相圖廬及
兄子根皆病死部落四散琨子遵先質於猗廬歟皆
服之及是遵與箕澹等帥廬眾三萬人牛馬十萬悉
歸琨琨由是復振建興末劉聰復攻之兵敗出飛狐
口奔幽州與段匹磾共拒石勒元帝立遣使上表勸
進大興二年遣樂平太守焦球攻常山斬石勒太守
邢泰會王敦欲謀逆密使匹磾殺琨匹磾矯詔收之
琨聞敦使至謂其少子曰處仲使來而不我告是殺

我也死生有命但恨讐恥未雪無以見二親耳匹磾
遂縊之三年後贈侍中太尉諡曰愍琨少負志氣有
縱橫之才與范陽祖逖爲友在晉陽嘗被賊騎圍數
重城中窘迫無計琨乘月登樓清嘯賊聞皆悽然中
夜吹胡笳賊又歔歔流涕有懷土之思向曉吹之賊
並棄圍而走

劉羣字公度琨子少拜廣武侯世子隨父在晉陽遭逢
寇亂數領偏將軍征討性清慎有裁斷得士類懼心
及琨爲匹磾所害琨從事中郎盧諶等率餘眾奉羣
依末波溫嶠表薦其才咸康二年成帝詔徵羣等末

波兄弟愛其才託以道險不遣石季龍滅遼西羣及
謐同沒胡中季龍皆優禮之以羣爲中書令至冉閔
敗後羣遇害

劉輿字慶孫琨兄儁朗有才局與琨並京師語曰洛中
奕奕慶孫越石辟宰府尙書郎兄弟素侮孫秀及趙
王倫輔政孫秀執權並免其官妹適倫世子芩芩與
秀不協復以輿爲散騎常侍齊王冏輔政以輿爲中
書侍郎東海王越以輿爲潁川太守及河間王邕檄
劉喬討范陽王虓並討輿虓敗輿與之並奔河北虓
旣鎮鄴以輿爲征虜將軍魏郡太守東海王越召之

與旣見越應機辯畫越傾膝酬接卽以爲左長史越旣總錄以輿爲上佐賓客滿筵文案盈几遠近書記日有數千終日不倦或以夜繼之皆人人懽暢莫不悅附命議如流酬對款備時人服其能號爲長才輿乃說越遣琨鎮并州爲越北面之重洛陽未敗病疽卒時年四十七贈驃騎將軍封定襄侯諡曰貞

劉演字始仁輿子除尙書郎東海王引爲主簿遷太子

中庶子出爲陽平太守自洛奔琨琨以爲魏郡太守

琨將討石勒以演行北中郎將兗州刺史鎮廩丘演

斬王桑走趙固得眾七千人爲石勒所攻拒戰勒退

元帝拜爲都督後將軍後爲石虎所圍求救於邵續
段鴛鴦救之虎走隨鴛屯厭次被害弟允爲琨引兵
路遇烏桓賊戰沒弟挹初爲東海王掾同琨被害挹
弟啟啟弟述與琨子羣俱在末波中後並沒入趙啟
爲石虎尙書僕射後歸國穆帝拜爲前將軍從殷浩
北伐爲姚襄所敗戰歿弟述爲石虎侍中隨啟歸國

拜驍騎將軍

以上
晉書

南北朝宋

甄法崇中山毋極人父匡位少府卿以清聞法崇宋永
初中爲江陵令在任嚴整縣境肅然於時南平繆士

通爲江安令卒官至其年末法崇在聽事士通前見
法崇知其已亡愕然未言坐定云卿縣人宋雅見負
米千餘石不還令兒窮弊不自存故自訴法崇因命
口受爲辭因遜謝下席而去法崇爲問繆家狼狽輸
送太守王華聞而歎美之

南史

南北朝梁

劉沼魏昌人晉驃騎將軍興六世孫幼善屬文及長博
學仕齊起家奉朝請冠軍軍行參軍天監初拜後軍臨
川王記室參軍秣陵令

梁書

甄彬法崇孫寓居南郡有行業鄉黨稱善嘗以一束苧

就州長沙寺庫質錢後贖苾還於苾束中得五兩金以手巾裹之彬得送還寺庫道人驚云近有人以此金質錢時有事不得舉而失檀越乃能見還輒以金半仰酬往復十餘彬堅然不受因謂曰五月披羊裘而負薪豈拾遺金者耶卒還金梁武帝布衣而聞之及踐祚以西昌侯藻爲益州刺史乃以彬爲府錄事參軍帶郫縣令將行同列五人帝誡以廉慎至彬獨曰卿昔有還金之美故不復以此言相屬由此名德益彰及在蜀藻禮之甚厚云

南史

甄恬無極人徙居江陵數歲喪父哀戚有若成人家人

矜其小以肉汁和飯飼之不肯食八歲嘗問其母恨
生不識父遂悲泣累日忽若有見言其形貌則父也
時以爲孝感家貧養母常得珍羞及居喪廬於墓側
常有異鳥鳴於塚樹恬哭則鳴哭止則止又有白鳩
白雀棲宿其廬州將表其行狀詔旌其門加以爵位
官至安南行參軍

南史

北魏

賈顯度中山無極人也父道監沃野鎮長史顯度形貌
偉壯有志氣初爲別將防守薄骨律鎮正光末北鎮
擾亂顯度乃率鎮人浮河而下達秀容爲爾朱榮所

留隨榮破葛榮封石艾縣公累遷南兗州刺史爾朱
榮之死顯度奔梁普泰初還朝後隨爾朱度律等敗
於韓陵與斛斯椿及弟智等先據河橋誅爾朱氏孝
武初除尙書左僕射尋加驃騎大將軍開府儀同三
司定州大中正永熙三年爲雍州刺史西道大行臺
宋

楊益孝宗時人正定梁蕉林所刻秋碧堂法帖內唐人
雙鉤蘭亭跋尾題淳熙五年十月朔魏昌楊益同觀
書法道逸必一時之雋

金

李維嶽宣宗興定二年仕至集賢院諮議詳見邑事

元

楊卞世祖時人與藁城楊湜中山楊珍齊名時有三楊之目見元史楊湜傳

明

張子清貢生萬厯間任山西太谷縣知縣興學育士減稅甦民晉中有何處春臺似太谷之謠厯陞永甯州石州均有惠政

國朝

張業書字肆六爲方望溪先生弟子以孝友世其家與

蠡縣李剛主友善嘗就剛主商所學康熙壬午副榜
由教習授山東青州樂昌縣知縣在官一年毀千金
家產以紓民困罷歸居貧寡如也故剛主每稱其幹
濟云

朱良北豐村人字玉齋康熙庚辰進士授江南太平縣
知縣有廉明稱幼而聰穎於書無所不讀學旣成思
以文章名世古文制義爲韓長洲俞長城所稱許尤
善草書邑人珍之著玉齋文集稿久佚

張陳謨字萬策旺川孫貢生性至孝九歲母病侍奉湯
藥衣不解帶者數月十一歲母歿哀毀骨立旣葬欲

廬墓父以其幼也止之十五歲父歿哀毀如喪母時繼母百端慰之始節哀廬於墓側晝則歸侍繼母孝養無缺堂弟承訓甫二歲父母相繼亡殯斂皆代爲經理勤教養俾得成立其表叔朱榮少孤且貧父歿時囑令周恤勿失所終其身遵遺命乾隆四十年

旌表入祀孝義祠

張清士生而穎異體魁偉英勇絕倫乾隆庚辰武進士授侍衛出爲建昌鎮標都司征金川屢立戰功陣亡事

聞賜卹給予雲騎尉世職

雷 霆少有勇力引强弓十餘石乾隆辛未武進士授
侍衛海陞副將以功擢福建總兵巡視海洋每遇盜
輒執大刀逐之當者盡披靡海盜聞風斂迹至今人
猶稱之爲雷大刀云

劉福祿雍正時人事繼母以孝稱繼母弟稍長欲析產
福祿痛已之不得事親也乃蠲誠求合居母卒喪葬
皆自任之人稱其友愛尤難得云孫清選武生事親
孝父歿家貧未葬一夕大風雨喪舍將傾悲號禱雨
中風雨頓止喪舍得無恙

高之璘南池陽村人字應祥諸生性仁厚好行其德遇